

Mir fuhre fröher för zo Zelte an der Rhing, un zwor en der Wießer Boge. Wä dat kennt, dat es zwesche Rudekirche un Wieß. Mer hatte jo kei Geld för ne große Urlaub. Minge Papp hatt dann si Mopedche un ene selvsgebaute Anhänger hingendraan, do wor et Zelt un de Luffmatratze drop, un do ha' mer do ein, zwei Woche Urlaub gemaht. Un mir Pänz mir woren su öm de zehn, unger zehn Johr ald, kunnte noch nit schwemme, ävver mer dorften do an dä bestemmte Stell bes an de Kneen en et Wasser gonn. Dat ha' mer och gedon. Der Papp hät och fein opgepass.

Eines Dags, mer han dann do Drievholz gesök un Muschele un dude Fesch ha' mer begrave un su jet, op eimol kom do su jet Blaues aan, wie ne Ball, wie su ne blaue Wasserball ha' mer eesch gedaach. Un wie dat nöherkom, mir kunnte jo nit hingonn, et kom zo uns gedrewve, do soche mir, dat dat en Badebotz wor. Un an dä Badebotz hing einer draan.

Do ha' mir zwei en Wasserleisch gefunge. Dat läuf mer hügg noch noh. Mir han dann laut "Papa! Hilfe! Hilfe!" geschreit, us däm Wasser rus - mir kunnten dä jo nit aanpacke -, der Papp hät dä rusgetrocke met noch enem Bekannte vun uns, han se och noch versök in widderzobeleben, ävver dat hät nit geklapp. Dä wor ad drei Dag em Rhing.



50-er/60-er Jahre beim Camping am Rhein (Weißer Bogen)

Dann moote mer bes nohm Bootshaus Berger zo Foß laufe. Mer hatte kei Handy, kei Telefon en der Nöh, un dann vun do us de Polizei aangerofe. Dann kom Rettungswage, Polizei un su wigger. Mir han dann em wohrste Senn vum Wood uns Zelte avgebroche un sin heimgefahre.

Vun do an si' mir ni' mih ent Wasser gegange. Un Zelte ha' mer en däm Johr och ni' mih gemaht. Dat ha' mer dann et Johr drop widder versök. Ävver zickdäm wor mer der Rhing immer e bessche unheimlich.

Kump, Elisabeth (67): *Der Wießer Boge*

miɛ fuɛɐə fɛø:ɐ tʃʊm tʃɛltə ʔan de ɪŋ ʔʊn tʃfa ʔen de vi:sə bo:ɐə vɛ dat kɛnt dat ʔes tʃfɛʃə 'ʁu:dəkiɪʃə
ʔʊn vi:s mə hatə jɔ ke jɛlt fə nə jɔ:sə ʔuɟlɔɹp miŋə pap hat:an si mopɛtʃjə ʔʊn_ənə 'sɛlfsjəbɔɹtə
'ʔa:nhɛŋɛ hiŋən'dɛa:n dɔ vɔ_ət:sɛlt ʔʊn də 'lʊfmatɛatʃə dɔp ʔʊn da hame dɔ ʔaɪn tʃfaɪ vɔxə 'ʔuɟlɔɹp
jəma:t ʔʊn miɛ pɛnts miɛ vɔ:bən zu ʔəm də tʃɛ:n ʔʊŋɛ tʃɛ:n jɔ: ʔalt kuntə nɔ nit ʃvɛmə ʔɛvɛ mɛɟ
dɔɟftən dɔ: ʔan dɛ bɛʃtɛmtə ʃtɛl' bes ʔan də knɛ:n_ɪn_ət vase jɔn dat ha_mə ʔɔx jɛdɔn de pap hɛd_ɔx
faɪn 'ʔɔpjəpas ʔʊn ʔɛɪnəs da:xs mə han dan dɔ də 'dɛi:fhɔlts jɛzø:k ʔʊn mʊʃələ ʔʊn du:də fɛʃ ha_mə
bɛjɛa'və ʔʊn zu jɛt ʔɔp 'ʔɛɪmɔl kɔ:m dɔ su jɛt blɔɹəs ʔa:n vi nə bal: so' nə vi zu ne blɔɹə 'vasebal
ha_mə ʔɛ:f:əda:x ʔʊn vi dat nɔɹɛ kɔ:m:ɪɟ kuntɪ jɔ nit 'hinjɔn ʔət kɔ:m tʃʊ ʔʊns jətɛvə dɔ so:xə miɛ
dat:at ʔɛn 'ba:dəpʊts fɔ: ʔʊn ʔan dɛ ba:dəbɔts hiŋ ʔɛ:nɛ dɛa:n dɔ ha_miɛ tʃfaɪ ʔɛn 'vasɛlaɪʃə jɛʃʊŋə
dat lɔɹf mə hɪk nɔx nɔ miɛ han dan lɔɹt 'papa hɛlfə hɛlfə jɛʃɛɪt ʔʊs tɛm vase ɪs miɛ kuntɪ dɔ jɔ nit
'ʔa:npakə dɛ pap hɛt:ɛ 'ɪsʃjətɛkə mɛt nɔɪ_ɛnəm bɛkantə fɔn ʔʊns han zɛ ʔɔ nɔx fɛzø:k_ən
'vidɛʃobə,lɛ:bən ʔɛvɛ dat hɛt nit jɛklap dɛ vɔ ʔad:ɛɪ dax ʔɛm ɪŋ ʔʊn dan mɔ:tə mə bes tʃʊm
'bo:tʃaɹs bɛkɹɛ tʃɔ fo:s lɔɹfə mə hatə ke hɛndi ke 'tɛlɛfɔn ʔɛn dɛ nɛ' ʔʊn dan fɔn dɔ: ʔʊs tɛ poli'tʃaɪ
'ʔanjəbo:fə ja ŋ_an kɔ:m dan 'ɪɛtʊŋsfa:bən poli'tʃaɪ ʔʊn su vɪɟə ʔʊn miɛ han dan ʔɛm vɔɟstɛn zɪnə dɛs
vɔɟɛts ʔʊnsɛ tʃɛltə 'ʔafjɔpɔxə ʔʊn sin hɛɪm jɛfa:bə ʔʊn fɔn dɔɟ ʔan sɪ miɛ ni mi_ənt vase jɛjanə ʔʊn
tʃɛltə ha_mə ʔɛn dɛm jɔ ʔɔx ni mi jəma:t:at ha_mə dan t_jɔ dɔp vidɛ fɛzø:k ʔɛvɛ tʃɪk'dɛm vɔ mə dɛ
ɪŋ ʔɪmɛɪ_ə bɛsjə 'ʔʊnhɪɪmlɪʃ

